

宋

史

一七



志卷第十三

宋史六十

開府儀同三司上柱國錄軍國重事前書記丞相監修國史領經筵事都總裁官朕等奉

勅修

天文十三流隕四

建中靖國元年正月癸亥星出西南如盂東北急流入尾  
距星沒青黑無尾跡明燭地崇寧元年三月庚辰星出張  
如金星西南急流至濁沒赤黃有尾跡明燭地五月丁卯  
星出尾如杯西南慢流入濁沒青白有尾跡明燭地閏六  
月癸酉星出斗向西南慢流至建沒青白有尾跡數小星  
從之八月己未星出羽林軍如杯急流至濁沒青白有尾

跡明燭地十月壬子星出天船如孟急流至五車沒青黑  
有尾跡聲隆隆然十二月己卯星出婁如金星西南慢流  
至外屏沒赤黃有尾跡明燭地二年正月戊申星出未位  
如金星急流至北河沒青白有尾跡明燭地六月戊午星  
出亢如金星西南急流入濁沒赤黃有尾跡明燭地九月  
辛巳星出牛如杯西南慢流至狗國沒青白有尾跡明燭  
地十一月甲辰星出參如金星西南急流至濁沒青白有  
尾跡明燭地十二月丁未星出大陵如金星至騰蛇沒赤  
黃有尾跡明燭地三年四月戊申星出軫如杯西北慢流  
入太微垣內屏星沒赤黃有尾跡明燭地又入太微又入

屏星六月丙午星出氐如金星東北慢流入天市垣赤黃  
有尾跡明燭地八月己酉星出建如杯西南急流至鼈沒  
青白有尾跡明燭地十二月甲子星出天大將軍如孟西  
北急流入王良沒赤黃無尾跡明燭地四年正月甲申星  
出角如孟西南慢流入濁沒青白無尾跡閏二月壬申星  
出井如金星西北急流入五車沒青白有尾跡明燭地三  
月庚子星出紫微垣華蓋如杯至鈞陳大星沒赤黃有尾  
跡明燭地五月庚申星出河鼓如孟西北急流入濁沒青  
白無尾跡十二月甲午星出參如杯東南慢流入軍市沒  
赤黃有尾跡明燭地五年六月庚午星出西咸如金星東

北急流入天市垣內沒青白有尾跡明燭地六月乙酉星  
出庫樓如杯向西急流入濁沒赤黃有尾跡明燭地九月  
癸卯星出天船如杯慢流至諸王沒青白有尾跡明燭地  
十二月壬戌星出奎向南急流入天倉沒青白有尾跡及  
三丈明燭地聲散如裂帛大觀元年二月丁卯星出參如  
杯西南急流入濁沒赤黃無尾跡明燭地四月辛未星出  
軫如孟向南慢流入濁沒青白有尾跡明燭地六月乙亥  
星出尾西南如杯西南慢流入濁沒青白有尾跡明燭地  
七月庚戌星出箕如杯西南急流入濁沒赤黃無尾跡照  
地明二年十二月癸卯星出奎如孟西北急流入造父沒

青白有尾跡照地明有聲政和元年四月丙辰星出亢如  
孟西北急流至右攝提沒赤黃有尾跡照地明五月辛巳  
日未中星隕東南二年九月乙卯星出斗如杯西南急流  
入濁沒赤黃有尾跡照地明三年四月丙申星出心如孟  
西南急流至積卒沒青白有尾跡照地明四年九月庚子  
星出墳墓如孟東南急流入羽林軍沒青白有尾跡照地  
明七年十二月甲子星出胃東南如孟西北急流至天大  
將軍沒赤黃有尾跡照地明重和元年九月庚辰星出斗  
魁南如孟東南急流至天淵沒赤黃有尾跡照地明宣和  
元年三月丁卯星出柳如孟東北急流入太微垣赤黃有

尾跡照地明十月戊子星出雲雨如孟西南慢流入羽林  
軍內沒青白照地明二年六月庚寅星出氐南如太白東  
北急流入天市垣無尾跡十二月辛巳星出奎西南如杯  
西南慢流至北沒赤黃有尾跡照地明三年七月癸未星  
出斗如太白東南急流入濁沒青白有尾跡照地明四年  
十一月丙寅星出王良北如杯急流至紫微垣內上輔北  
沒赤黃有尾跡照地明五年二月丙午星出北河東北如  
杯東南慢流至軫沒赤黃有尾跡照地明六年七月丁酉  
星出太陽守如孟東北急流入濁沒赤黃有尾跡照地明  
七年十一月戊子星出王良北如杯急流入紫微垣上輔

北赤黃有尾跡照地明靖康元年二月丙辰星出張如太  
白東南急流至濁沒青白有尾跡照地明又星出北河如  
太白東南慢流至軫東沒赤黃有尾跡照地三月壬辰星  
出紫微垣內鈞陳東南如金星東北慢流至濁沒赤黃有  
尾跡照地五月乙未星出權東北如桃西北急流至濁沒  
青白有尾跡照地六月癸丑星流大如五斗器衆光隨之  
明照地起東南墜西北有聲如雷庚申星出紫微垣內華  
蓋東南如金星向北急流至左樞沒二年正月乙未大星  
出建向西南急流至濁沒赤黃有尾跡照地建炎四年六  
月乙酉星出紫微垣鈞陳十月辛未星出壁紹興元年四

月甲戌星出東方晝隕七月乙未朔星出河鼓八月辛未  
星出羽林軍十一月庚戌星出婁宿西南丁巳星出天槍  
北十二月甲子朔星出大陵西北二年三月甲午星出紫  
微垣華蓋西南乙卯星出角丁巳星出紫微垣右樞星戊  
午星出軒轅大星西南閏四月乙巳星出太微垣西右執  
法北五月癸未星出河鼓五年十月壬戌星出室東南赤  
黃而大六年十月壬子星出壁西北七年八月壬寅星隕  
于觜八年十一月乙巳星出天囷東北九年五月癸未星  
出房宿東南十七年八月己未星出危宿慢流至貫索沒  
青白色有尾跡照地明大如太白二十六年六月丁亥星

出東北方光明照地二十八年六月戊戌星晝隕有尾長  
三丈至西北沒二十九年八月戊寅星出紫微垣西南約  
長三尺赤黃色西南急流至鈞陳大星東北沒三十一年  
六月乙卯星出右攝提赤白色急流向東南沒有尾跡大  
如歲星丁巳星出青白色自東北急流向東南沒有尾跡大  
如盞口甲子星出氐赤黃色慢流至角宿天田沒初小  
後大如太白後有小星隨之九月壬午星晝隕約長三丈  
隆興元年六月丁丑星出尾宿青白色向東南慢流沒七  
月壬寅星出天市垣內赤色向西北慢流至右攝提西南  
沒炸散小星二十餘顆有聲尾跡大如太白丙午又出天

市垣慢流至氐宿沒青白色微有尾跡小如填星癸丑星出織女急流向貫索西北沒青白色明大如土星照地丙辰星出輦道急流入天棓西南沒赤黃色有尾跡小如土星八月庚申星出羽林軍赤黃色向東南急流至濁沒戊辰星出虛宿赤黃色急流至牛宿西南沒壬申星出天市垣赤青色慢流至西咸西北沒癸酉星出壁宿赤黃色急流犯王良星沒如太白丙子星出羽林軍門青白色慢流委曲行至東南濁沒辛巳星出南斗赤黃色慢流入羽林軍沒有尾跡大如金星次有星一赤黃色有尾跡亦如金星出雲雨星慢流向西南至女宿之下沒戊子星出羽林

軍門東南慢流至濁沒青白色有尾跡大如土星又星一  
青白色出天倉向東南急流有尾跡小如木星至濁沒九  
月庚戌星出紫微垣外坐赤黃色向西北急流抵紫微垣  
內坐尚書星沒十一月庚寅星出軫宿急流向東南騎官  
星沒赤黃色有尾跡大如木星丁未飛星出天船急流向  
紫微垣外坐內厨西北沒炸出二小星青白色有尾跡照  
地大如木星二年二月辛酉飛星出權星慢流至太微垣  
內五帝坐大星西南沒青白色微有尾跡大如歲星六月  
丁丑星出王良青白色急流犯天津西南沒己卯飛星出  
造父急流入紫微垣內鈎陳大星東南沒青白色大如填

星辛亥星出天闕急流貫入畢口西北沒有尾跡照地明  
大如太白赤黃色十月丙辰星出趙國向西南慢流犯趙  
東星沒有尾跡大如填星赤黃色十一月壬午朔星出卯  
位慢流至西南沒有尾跡照地明大如太白青白色癸未  
星出犯弧矢急流至天廟東南沒有尾跡大如太白青白  
色丁亥星出天苑向西南慢流至濁沒微有尾跡大如太  
白色赤黃癸卯星出羽林軍慢流向西南濁沒大如太白  
色赤黃辛亥星出南河向東南慢流至翼宿沒微有尾跡  
大如太白色赤黃十二月壬午星出弧矢向東南至濁沒  
有尾跡照地明大如太白色青白乾道元年三月丙辰星

出周國急流至天雞沒微有尾跡大如歲星色黃白甲子  
星出張宿慢流向西南至濁沒有尾跡照地明大如太白  
色赤黃五月丁丑星出河鼓白色向東北慢流至濁沒有  
尾跡照地明大如太白六月甲辰星出東北慢流向西南  
沒有尾跡音聲大如太白色赤黃七月壬戌星出西南慢  
流至東南沒大如歲星色赤黃庚午星出代國慢流至趙  
國沒大如歲星色青白九月戊申星出王良慢流至尾宿  
沒十月癸未星出權星東南急流至太微垣沒有尾跡照  
地明如太白色青白二月庚子星出西北方急流至  
濁沒明大如歲星色青白六月丙子星出角宿急流至軫

宿沒有尾跡大如太白色赤黃七月己巳星出織女急流至天市垣內宗星沒有尾跡大如歲星青白色十一月己未星出急流東南蒼黑雲間沒大如歲星色青白十二月星出天關急流至外屏星沒有二小星隨之赤黃色微有尾跡大如歲星三年九月甲午星出卷舌急流至婁宿沒有尾跡大如歲星黃白色又有星青白色出北斗急流至少宰西北沒大如歲星五年七月甲子星出宗正赤色慢流至女宿沒有尾跡照地明大如歲星九月丙辰星出赤黃色如蛇入天棓沒六年九月辛巳星出狼星入弧矢至濁沒微有尾跡大如填星赤黃色十月庚戌星出天囷急

流至濁沒有尾跡大如歲星赤黃色七年七月戊戌星大  
如拳急流向西北方至濁沒有尾跡照地如電九月甲午  
透雲星出急流向西南方至濁沒高丈餘有尾跡照地明  
大如太白色青白淳熙三年正月辛未星出狼星急流至  
濁沒尾跡照地明大如太白四月戊戌星出角宿青白色  
五年八月乙巳星出狼星急流向東南沒微有尾跡大如  
太白青白色六年八月壬辰星出紫微垣鈎陳大星慢流  
至濁沒有尾跡大如盞口青白色七年五月乙亥星出天  
市垣內東海星慢流祚作三小星有尾跡照地大如盞口  
青白色八月丁未星出貫索大星西北急流至濁沒有尾

跡照地明大如太白色青白十一年四月乙丑星出自中  
天慢流向東北方沒微有尾跡炸作小星相從有聲明大  
如太白色青白十五年二月辛未星出太尊大如盞口急  
流至濁沒色青白慶元二年九月甲午四年六月甲午星  
皆晝隕七月壬寅星出羽林軍下青白色大如椀九月丁  
巳星出奎宿向壁壘陣沒赤白色大如太白五年六月丁  
丑星出東北慢流至西南方沒大如歲星青白色九月壬  
子星出西南慢流向東北沒大如太白青白色嘉泰二年  
四月辛巳星出西北急流東北至濁沒色赤十月乙酉星  
出五車大如歲星四年十一月庚午星出天津急流入天

市垣沒開禧元年正月庚子星出中天赤色大如太白向  
濁沒七月癸亥星出天津入斗宿東南沒色赤大如太白  
二年六月癸丑星出招搖入庫樓色赤大如太白嘉定元  
年六月辛未星出天津東北慢流向天市垣沒二年六月  
壬午星出織女東南慢流入天市垣沒色赤有尾跡照地  
明大如太白庚寅星出中天急流向東北至濁沒三年九  
月己酉星夕隕五年七月乙巳星出中天慢流向西南方  
至濁沒六年五月癸亥星晝隕九月癸卯星夕隕丁巳星  
晝隕十月戊戌星出昴宿西南慢流向天廩東南沒壬戌  
星出西南慢流至濁沒青白色十二月壬寅星晝隕七年

三月壬午星出軫宿距星東南慢流至濁沒五月辛卯星出天津西南慢流向心宿西北沒八年七月癸未星出室宿距星東北急流向天倉星西北沒乙酉星出織女東南慢流向牛宿西北沒有尾跡照地明大如太白青白色八月甲辰星出天津西南慢流向河鼓東北沒十二月丙申星出五諸侯東北慢流向天關西南沒有聲及尾跡明照地赤黃色九年六月乙巳星出牛宿距星東北慢流至濁沒十年五月壬申星出尾宿距星西北慢流向牛宿距星東南沒十一年六月乙卯星出河鼓距星西南急流向正西至濁沒十二年十一月己亥星出昴宿東南急流至濁

沒十三年十二月丁巳星出參旗東北慢流至濁沒赤黃色十四年二月壬午星出南河距星東南慢流向西南至濁沒赤黃色八月戊午星出房宿距星急流至濁沒有尾跡照地明大如太白赤黃色十一月甲申星出天倉距星西北慢流向東南方至濁沒赤黃色十六年十一月壬戌星出五諸侯東北急流向西北至濁沒色赤黃隆隆有聲及尾跡照地大如盞寶慶二年四月辛亥星出大如太白紹定元年六月己酉星晝隕二年正月庚辰九月壬辰星出大如太白三年十一月丁未星晝隕四年七月庚戌星出大如太白九月甲辰星晝隕五年八月甲寅星夕隕閏

九月己酉星出大如太白端平元年六月丙戌星西南行  
大如太白有尾跡照地明二年四月戊子星出大如太白  
六月庚辰星晝隕七月丁酉星出大如太白辛丑星晝隕  
十月辛卯星出大如太白三年五月庚辰星出心宿大如  
太白六月癸巳星夕隕嘉熙元年正月壬午星出大如太  
白二月己丑星夕隕九月癸丑星出七公西至濁沒十月  
戊戌星出大如桃二年四月甲子七月辛卯九月乙未星  
出大如太白六月甲辰八月癸亥星晝隕三年三月甲戌  
星晝隕八月辛丑星出大如太白四年正月辛巳六月戊  
午星出大如太白二月辛丑三月癸未星晝隕淳祐元年

六月癸酉星出大如太白己卯星晝隕三年六月甲戌星  
出氐宿距星大如太白八月乙卯星晝隕四年四月丙子  
星出尾宿距星下大如太白六月乙未星出畢宿大如太  
白六年七月癸酉星出室宿大如太白九月甲子星出斗  
宿尾跡青白照地大如太白七年九月丙辰星出室宿八  
年六月甲辰星出河鼓大如太白十月丙戌星出角宿距  
星九年六月壬戌其日星自南方急流至濁沒赤黃色大  
如太白十月壬申星出織女十年四月丁酉明星夕隕十  
一年七月丁丑星出畢宿距星赤黃色大如太白八月己  
丑朔星夕隕十二年四月庚申星出角宿亢星大如太白

八月癸丑星出角色赤照地寶祐元年四月丁巳星出大如太白二年七月庚戌星出大如太白三年七月辛酉星出大如太白十月丁丑星出畢宿距星五年七月丁卯星出大如桃六年九月戊辰透霞星出開慶元年六月己亥星出斗宿河鼓急流向東南至濁沒赤黃色有音聲星跡照地明大如太白景定元年七月丙子星出東南大如太白十月乙卯星出東北急流向太陰有音聲尾跡照地明大如桃三年四月甲辰星出大如蓋六月己酉星出大如熒惑九月丙子星出大如太白閏九月丙戌透霞星出大如太白庚子星出大如太白四年五月戊戌星出角宿距

星六月丁卯星出河鼓八月乙卯星出天倉五年二月壬  
戌星出畢宿五月甲午星出河鼓大星東南急流向西北  
至濁沒赤黃有尾跡照地明大如太白七月己卯星出右  
攝提咸淳二年六月甲戌星出左攝提三年七月庚寅星  
出昴宿東南急流至濁沒赤黃有尾跡照地明大如太白  
四年七月戊午星出氐宿距星西北急流入騎官星沒赤  
黃有尾跡照地明大如桃五年五月庚申星出斗宿距星  
東北急流向牛至濁沒六月庚寅星出斗宿七月壬戌星  
出東南河鼓距星西北急流至濁沒德祐元年四月癸亥  
有大星自心東北流入濁沒

妖星

建隆二年五月己丑天狗墮西南紹興十七年正月乙亥  
妖星出東北方女宿內小如歲星光芒長五丈二月丙寅  
始消淳熙十三年九月辛亥星出大如太白色先赤後黃  
白尾跡約二尺委曲如蛇行類枉矢十四年五月有星出  
濁際大如日與日相摩盪而入嘉定十一年五月癸未蚩  
尤旗竟天端平二年春天狗墜懷安金堂縣聲如雷三州  
之人皆聞之化爲碎石其色紅咸淳十年九月壬寅有星  
見西方曲如蚯德祐元年二月丁亥有星二闕于中天頃  
之一星墜

星變

紹興三十一年六月戊午大角星東北生角隆興二年九月戊戌大角光體搖動十月丙子弧矢九星內矢一星偏西不向狼星乾道元年八月乙巳大角光體搖動淳熙元年七月辛亥奎宿生芒

雲氣

乾德三年七月己卯夜西方起蒼白氣長五十丈貫天船五車豆井宿開寶元年十月己未旦西北起蒼白氣三道長二十丈趨東散太平興國四年四月己巳夜西北有白氣壓北斗雍熙三年正月己未夜赤氣如城四年正月癸

酉夜白氣起角亢經太微垣歷軒轅大星至月傍散端拱  
元年十月壬申遲明巽上有雲過中天連地濃潤前赤黃  
後蒼黑色先廣後大行勢如截十一月戊午夜西北方有  
氣如日脚高二丈至道二年二月丙子夜西方蒼白色氣  
長短八道如彗掃稍經天漢參錯如交蛇咸平三年十月  
辛亥黑氣貫北斗十二月庚午黑氣長三丈餘貫心宿入  
天市垣抵帝坐久方散四年三月丙申白氣二豆天十月  
辛亥黑氣貫北斗五年正月白氣如虹貫日久而散七月  
戊戌白氣如陣貫東井六月己巳白氣東西亘天丁丑白  
氣貫日六年五月辛亥白氣出昴至東壁沒六月辛未赤

氣出貫天丙子白氣出河鼓左右旗分為數道沒七月癸卯白氣如彗起西南景德元年三月白氣貫軒轅蒼白氣十餘如布亘天五月乙巳白氣數道如芒埽長七尺許七月辛亥黃氣出壁長五丈餘十一月癸丑黑氣十餘道衝日二年正月丙寅黃白氣貫月黑氣環之二月丁丑白氣五道貫北斗十月丙子白氣出閭東西孛孛有光三年三月丙辰北方赤氣亘天白氣貫月四月癸卯黃氣如柱貫月十月甲午黑氣貫北斗毘四年三月己未白氣東西亘天庚申白氣出南方長二丈許久而不散四月庚午白氣貫北斗長十丈庚寅白氣如布襲月三丈許甲午南方有

黑氣貫心宿長五丈許十一月己巳中天有赤氣如掃長  
七尺在輿鬼南大中祥符九年正月癸亥朔黃氣出於艮  
丁丑白氣二東西亘天七月西北方白雲氣如華葦三十  
餘條二年九月戊午黃氣如柱起東南方長五丈許三年  
四月丁巳中天黑氣東西亘天十二月癸亥青赤氣貫太  
微五年二月壬寅白氣長五丈出東井貫北斗魁及軒轅  
七年五月有氣出紫微為宮闈狀光燭地天禧三年四月  
黃氣如柱貫月天聖七年二月己卯夜蒼黑雲長三十丈  
貫弧矢翼軫明道元年十月庚子夜黃白氣五貫紫微垣  
十二月壬戌西北有蒼白氣亘天景祐元年八月壬戌青

黃白氣如彗長七尺餘出張翼之上凡三十三日不見四年七月戊申夜黑氣長丈餘出畢宿下寶元二年正月壬子夜蒼黑雲起西北方長三十尺漸東南行歷婁胃昴畢及火木相次中天而散三月甲寅夜細黑雲起西北方長三十丈貫王良及營室康定元年三月丙子夜東南方近濁黑色橫亘數丈闊尺許良久散六月壬子黑氣起心宿西長五十丈首尾侵濁久之散慶曆元年八月庚辰夜東方有白氣長十尺許在星宿度中至十日長丈餘衝天相居星宿大星南九十餘日沒壬午夜黑氣起西南長七丈貫危宿羽林入濁至天津良久散癸卯夜蒼白雲起西北

闊二尺許首尾至濁良久沒二年十一月壬申黑氣貫北斗柄八月甲申白雲貫北斗三年正月戊戌中天有白氣長二十丈向西南行貫日四月癸卯白氣二生西北隅上中天首尾至濁東南行良久散七月戊辰西南生黑氣長三丈許經天而散八月壬子夜白氣貫北斗魁四年五月甲子夜黑氣起東北方近濁長五丈許良久散九月辛巳夜中天有氣長二丈許貫卷舌南河東北少頃散十一月甲子夜蒼白雲起南近濁久方散八年正月丁酉夜黑氣生首尾至濁漸東行久之乃散二月辛卯夜西方近濁生黑氣長三丈良久散皇祐四年十一月壬寅夜黑氣生東

方南北至濁貫參宿軒轅辛酉夜白氣起北方近濁長五  
丈許歷北斗久之散治平元年六月戊午夜蒼白雲起東  
北方長一丈許貫畢二年二月乙未夜蒼黑雲起西北方  
長五丈許貫東井及北斗良久散四月癸巳夜蒼黑雲起  
西北方長三十尺西至軒轅太民北抵鈎陳丙午夜西北  
方有白氣漸東南行首尾至濁貫角宿移西北久方散九  
月庚申夜西北蒼黑雲長三丈許貫營室壁壘陣及天河  
三年六月丁未夜東方有蒼白雲長一丈許貫畢四年二  
月癸巳夜蒼白雲起南方長三丈闊尺貫南門星三月甲  
寅夜西南方起蒼白雲二長三丈闊尺相距二尺貫東井

南河久之乃散閨三月辛巳夜蒼黑雲起南方兩首至濁  
闊尺貫尾箕斗牛庫樓騎官五月戊寅夜蒼黑雲起北方  
長三丈闊尺貫紫微垣王良壬寅夜蒼黑雲起北方長三  
丈闊尺貫紫微垣甲辰夜蒼黑雲起東方長丈闊尺貫天  
苑五車參旗六月癸亥夜白雲起東北方長五丈上闊下  
狹貫天船閣道傳舍紫微垣天棓戊辰夜黑雲起北方長  
三丈闊尺貫北斗紫微垣王良八月乙亥夜黑氣起西北  
方長丈闊尺貫北斗十月庚申夜黃氣一上下貫月中十  
一月丙子夜蒼黑氣起南方長五丈闊二尺東至庫樓北  
至南河橫貫翼十二月庚戌夜蒼黑雲起南方長三丈闊

二尺貫五車東井五諸侯熙寧元年正月乙酉夜蒼白雲  
起西南方長四丈闊尺貫月及南河輿鬼軒轅六月己酉  
夜蒼黑雲起北方長二丈闊尺貫北斗魁東貫文昌十月  
庚申夜蒼黑雲起北方東西兩首至濁貫織女天棓紫微  
垣北斗魁二年四月甲辰夜蒼白雲起東南方長三丈闊  
尺貫天市垣六月辛酉夜蒼黑雲起西南方長四丈闊二  
尺貫大角左右攝提天市垣斗女牛七月甲申日下有五  
色雲十一月每夕有赤氣見西北隅如火至人定乃滅三  
年二月庚申夜蒼黑雲起西北方長三丈闊二尺貫王良  
扶箱天厨六月己未夜蒼黑雲起西北方長丈闊尺貫五

車又起西北長丈餘貫北斗魁文昌五年七月丁亥夜白  
雲起南方長丈貫氐房心六年五月庚申夜蒼黑雲起東  
北方長五丈闊二尺貫雲雨閣道七年三月壬子蒼白雲  
起西南方長二丈闊尺貫日經中天過白氣如帶四月壬  
申夜蒼白雲起北方長五丈闊二尺貫北斗魁鈞陳王良  
閣道東至奎丙戌夜蒼白雲起西北方長三丈闊尺貫東  
井紫微垣鈞陳六月辛未夜蒼黑雲起天河中長五丈南  
北兩首至濁貫尾箕又蒼黑雲起東方長五丈貫羽林外  
屏甲戌蒼白雲起西方長三丈貫軫角太微丙戌夜蒼白  
雲起南方長二丈貫危室壁及八魁丁亥夜蒼白雲起東

方長二丈貫月及畢奎婁外弔又起南方長二丈貫危室  
壁及八魁壬辰夜蒼白雲起西南方長二丈貫天棓紫微  
垣癸巳夜蒼黑雲起東方長五丈貫牛天倉歲太白卷舌  
七月庚戌夜蒼白雲起東方長丈餘貫參旗及參八年二  
月己巳夜蒼黑雲起西方長丈貫軫軒轅乙酉夜蒼黑雲  
起東方長三丈貫心天市垣列肆宗人五月壬戌夜蒼黑  
雲起西南方長二丈貫氐房心癸亥蒼黑雲起西方長三  
丈貫軒轅太微垣五帝坐十月庚子夜黑雲起西北方長  
三丈貫畢大陵鈞星九年四月庚寅夜白氣起東北方天  
棓入天市垣辛亥夜蒼黑雲起南方長二丈貫庫樓騎官

積卒心尾六月乙未夜蒼白雲起東北方長四丈貫室壁  
閣道七月己亥夜蒼黑雲起南方長四丈貫軍市天園十  
月乙酉夜蒼黑雲起西北方長四丈貫北斗鈎車府十年  
六月癸未夜蒼黑雲起南方長三丈闊尺貫龜鼈天淵乙  
巳夜蒼白雲起東北方長三丈闊尺貫五車及畢七月丙  
子夜蒼黑雲起北方長丈貫北斗魁八月庚辰蒼黑雲起  
東北方長二丈貫參井北河五諸侯九月庚申夜蒼黑雲  
起北方由北斗魁杓貫紫微垣至天棓十月辛丑夜蒼黑雲  
起南方長二丈貫斧鉞鉦鑽元豐二年四月戊申夜白  
雲起南方長三丈貫庫樓積卒龍尾辛亥夜蒼白雲起南

方長三丈貫房五年四月壬申夜蒼白雲起北方長二丈  
出太微垣貫五帝坐常陳八年十月庚申夜蒼黑雲生北  
方長三丈闊尺貫北斗文昌天槍元祐三年七月戊辰夜  
東北方近濁天明照地如月將出偏西北有白氣經天九  
月己酉夜赤氣起北方漸生白氣數道紹聖二年十一月  
桂陽監慶雲見元符二年九月戊辰夜赤氣起北方紫微  
垣北斗星東南次有白氣十道各長五尺崇寧元年十一  
月己酉赤氣隨日沒二年五月戊子夜蒼白氣起東南方  
長三丈貫尾箕斗政和元年十一月甲戌夜蒼白氣起紫  
微垣貫四輔五年四月庚子有白雲自北直徹中天漸成

五色如華蓋七年五月乙卯夜赤雲白氣起東北方宣和  
元年六月辛巳夜赤氣起北方半天如火七月戊午夜赤  
雲起東北方貫白氣三十餘道二年二月戊戌夜赤雲起  
東北漸向西北入紫微垣三年九月壬午夜蒼白氣長三  
丈貫月四年九月丁丑西方日下有赤氣七年四月壬子  
夜有赤雲入紫微垣靖康元年正月丁丑夜赤白氣起西  
方九月戊寅有赤氣隨日出九月乙未西方日下有赤氣  
十一月乙丑日下有赤氣閏十一月丁酉赤氣亘天二年  
正月己亥夜西北陰雲中有火光長二丈餘闊數尺時時  
見二月壬午夜白氣如虹自南亘北漸移西南至東北三

月戊子夜白氣貫斗建炎元年八月壬申東北有赤氣四年五月壬子赤雲亘天中有白氣十餘道貫之如練起於紫微犯北斗及文昌由東南而散紹興元年二月己巳白氣亘天七年正月辛未夜東北赤氣如火出紫微宮二月癸卯又如之十一月癸卯有赤雲如火隨日入八年九月甲申朔夜有赤氣如火出紫微垣內十八年八月丁亥西方赤氣如火三十七年二月乙酉赤氣出紫微垣十月壬寅赤氣隨日出三十年正月壬申東北方赤氣一帶五處如火影十一月甲午西南方白氣自尾歷聳妻昴宿十二月戊申其夜白氣出尾宿歷心房氐亢角入天市貫太

微至卽位止有類天漢三十一年十二月辛丑其夜白氣出斗宿歷牛女危至婁止約廣六丈類天漢東西亘天隆興元年十二月壬午其夜白氣出危宿歷室壁奎胃婁至昴止二年十一月庚寅其日赤雲氣徧天隨日入乾道元年正月庚午其夜白氣出奎宿漸上經婁胃昴貫畢入參宿內三月戊辰其夜白氣自參宿至角宿止與天漢相接約廣七丈四月丁酉其夜蒼白氣自西北漸上東北入天市垣辛丑入北斗魁中及入文昌星乙巳入紫微垣內至北極天樞中十月己丑蒼白雲氣長二丈穿入翼宿十一月丙寅白氣出女宿歷虛危室壁奎婁胃宿入昴宿止

二年十二月庚子白氣亘天六年十月庚午赤氣隨日出  
十一月丁丑赤氣隨日入七年七月壬寅赤氣隨日入十  
月己未赤氣隨日出八年十月乙巳赤氣隨日入丙午隨  
日出九年十月壬申其日商雲見淳熙元年十月戊寅東  
北方生曲虹三年八月丁酉赤氣隨日入戊戌隨日出五  
年十月丁巳生曲虹十年正月戊子西南有白氣如天漢  
而明南北廣六丈東西亘天十四年十一月甲寅赤氣隨  
日入紹興四年十一月甲戌夜赤雲白氣見五年六月壬  
寅白氣如帶亘天己酉又如之慶元四年八月庚辰白氣  
如帶亘天五年二月癸酉夜白氣如帶亘天八月癸亥又

如之嘉泰四年二月庚申赤氣亘天十一月壬申其日白  
氣如帶亘天癸酉虹見嘉定六年十月乙卯赤氣隨日出  
十一月辛卯隨日入嘉熙四年二月丙辰白氣亘天淳祐  
二年二月癸丑朔白氣亘天十年十一月丁丑虹見景定  
三年七月甲申夜白氣亘天如匹布

志卷第十三

志卷第十四

宋史六十一

開府儀同三司上柱國錄軍國事前書至丞相監修國史領經筵事都總裁臣脫等奉

穆

五行一上 水上

天以陰陽五行化生萬物盈天地之間無非五行之妙用人得陰陽五行之氣以為形形生神知而五性動五性動而萬事出萬事出而休各生和氣致祥乖氣致異莫不於五行見之中庸至誠之道可以前知國家將興必有禎祥國家將亡必有妖孽見乎蓍龜動乎四體禍福將至善必先知之不善必先知之人

之一身動作威儀猶見休咎人君以天地萬物為體禎祥妖孽之致豈無所本乎故由漢以來作史者皆志五行所以示人君之戒深矣自宋儒周惇頤太極圖說行世儒者之言五行原於理而究於誠其於洪範五行五事之學雖非所取然班固范曄志五行已推本之及歐陽脩唐志亦采其說且於庶徵惟述災眚而休祥闕焉亦豈無所見歟舊史自太祖而嘉禾瑞麥甘露醴泉芝草之屬不絕於書意者諸福畢至在治世為宜祥符宣和之代人君方務以符瑞文飾一時而丁謂蔡京之姦相與傳會而為欺其應果安在

哉高宗渡南心知其非故宋史自建炎而後郡縣絕無以符瑞聞者而水旱札瘥一切咎徵前史所罕見皆屢書而無隱於是六主百五十年兢兢自保足以圖存易震之彖曰震來虩虩恐致福也人君致福之道有大於恐懼脩省者乎昔禹致群臣於會稽黃龍負舟而執玉帛者萬國孔甲好鬼神二龍降自天而諸侯相繼畔夏桑穀共生于朝雉升鼎耳而雊而大戊武丁復脩成湯之政穆王得白狼白鹿而文武之業衰焉徐偃得朱弓矢宋潛有雀生鷁二國以霸亦以之亡大槩徵之休咎猶卦之吉凶占者有德以勝

之則凶可為吉無德以當之則吉乃為凶故德足勝妖則妖不足慮匪德致瑞則物之反常者皆足為妖妖不自作人實興之哉今因先後史氏所紀休咎之徵彙而輯之作五行志

潤下水之性也水失其性則為災沴舊說以恒寒鼓妖魚孽豕禍雷電霜雪雨雹黑眚黑祥皆屬之水今從之醴泉河清雖為瑞應苟非其時未必不為異故雜附于編他如甘露嘉禾芝草一切祥瑞之物見于後者因其事而考其時則休咎自見故亦各以類相

從云

建隆元年十月棣州河決壞厭次商河二縣居民廬  
舍田疇二年宋州汴河溢孟州壞堤襄州漢水漲溢數

丈四年八月齊州河決九月徐州水損田乾德二年

四月廣陵揚子等縣潮水害民田七月泰山水壞民  
廬舍數百區牛畜死者甚衆三年二月全州大雨水

七月蘄州大雨水壞民廬舍開封府河決溢陽武河

中府孟州並河水漲孟州壞中潯軍營民舍數百區

河壞隄岸石又溢于鄆州壞民田泰州潮水損盐城

縣民田淄州濟州並河溢害鄒平高苑縣民田四年

東阿縣河溢損民田觀城縣河決壞居民廬舍注大

名又靈河縣隄壞水東注衛南縣境及南華縣城七月榮澤縣河南北隄壞八月宿州汴水溢壞堤淄州清河水溢壞高苑縣城溺數百家及鄒平縣田舍泗洲淮溢衡州大雨水月餘五年衛州河溢毀州城沒溺者甚衆開寶元年六月州府二十三大雨水江河汎溢壞民田廬舍七月泰州潮水害稼八月集州霖雨河漲壞民廬舍及城壁公署二年七月下邑縣河決是歲青蔡宿淄宋諸州水真定澶滑博洛齊潁蔡陳亳宿許州水害秋苗三年鄭澶鄆淄濟魏蔡解徐岳州水災害民田四年六月汴水決宋州穀熟縣濟

陽鎮又鄆州河及汶清河皆溢注東阿縣及陳空鎮  
壞倉庫民舍鄭州河決原武縣蔡州淮及白露舒汝  
廬潁五水並漲壞廬舍民田七月青齊州水傷田五  
年河決澶州濮陽絳和廬壽諸州大水六月河又決  
開封府陽武縣之小劉村宋州鄭州並汴水決忠州  
江水漲二百尺六年鄆州河決楊劉口懷州河決獲  
嘉縣潁川淮渾水溢渰民舍田疇甚衆七月歷亭縣  
御河決單州濮州並大雨水壞州廨倉庫軍營民舍  
是秋大名府宋亳淄青汝澶滑諸州並水傷田七年  
四月衛亳州水泗州淮水暴漲入城壞民舍五百家

安陽縣河漲壞居民廬舍百區八年五月京師大雨  
水濮州河決郭龍村六月澶州河決頓丘縣沂州大  
雨水入城壞居舍田苗九年三月京師大雨水淄州  
水害田太平興國二年六月孟州河溢壞溫縣堤七  
十餘步鄭州壞滎澤縣寧王村堤三十餘步又漲于  
澶州壞英公村堤三十步開封府汴水溢壞大寧堤  
浸害民田忠州江漲二十五丈興州江漲毀棧道四  
百餘間管城縣焦肇水暴漲踰京水濮州大水害民  
田凡五千七百四十三頃潁州潁水漲壞城門軍營  
民舍七月復州蜀漢江漲壞城及民田廬舍集州江

漲汎嘉川縣三年五月懷州河決獲嘉縣北注又汴水決宋州寧陵縣境六月泗州淮漲入南城汴水又漲一丈塞州北門十月滑州靈河已塞復決四年三月河南府水漲七尺壞民舍泰州雨水害稼宋州河決宋城縣衛州決汲縣壞新場堤八月梓州江漲壞閣道營舍九月澶州河漲鄆州清汶二水漲壞東陽縣民田復州澮陽縣湖鼎漲壞民舍田稼五年五月潁州潁水溢壞堤及民舍徐州白溝河溢入州城七月復州江水漲毀民舍堤塘皆壞六年河中府河漲陷連堤溢入城壞軍營七所民舍百餘區鄜延寧州

並三河水漲溢入州城鄜州壞軍營建武指揮使李海及老幼六十三人溺死延州壞倉庫軍民廬舍千六百區寧州壞州城五百餘步諸軍營軍民舍五百二十區七年三月京兆府渭水漲壞浮梁溺死五十四人四月耀密博衛常潤諸州水害稼六月均州潰水均水漢江並漲壞民舍人畜死者甚衆又河決臨邑縣漢陽軍江水漲五丈七月大名府御河漲壞濟口南劍州江水漲壞居民舍一百四十餘區京兆府咸陽渭水漲壞浮梁工人溺死五十四人九月梧州江水漲三丈入城壞倉庫及民舍十月河決懷州武

陝縣害民田八年五月河大決滑州房村徑澶濮曹  
濟諸州浸民田壞居民廬舍東南流入淮六月陝州河  
漲壞浮梁又永定澗水漲壞民舍軍營千餘區河南  
府澍雨洛水漲五丈餘壞鞏縣官署軍營民舍殆盡  
穀洛伊瀍四水暴漲壞京城官署軍營寺觀祠廟民  
舍萬餘區溺死者以萬計又壞河清縣豐饒務倉庫  
軍營民舍百餘區雄州易水漲壞民廬舍鄜州河水  
漲溢入城壞官寺民舍四百餘區荆門軍長林縣山  
水暴漲壞民舍五十一區溺死五十六人八月徐州  
清河漲壞民舍七尺溢出塞州三面門以禦之九月宿州

睢水漲汎民舍六十里是夏及秋開封浚儀酸棗陽  
武封丘長垣中牟尉氏襄邑雍丘等縣河水害民田  
九年七月嘉州江水暴漲壞官署民舍溺者千餘人  
八月延州南北兩河漲溢入東西兩城壞官寺民舍  
淄州霖雨孝婦河漲溢壞官寺民田孟州河漲壞浮  
梁損民田雅州江水漲九丈壞民廬舍新州江漲入  
南砦壞軍營雍熙二年七月朗江溢害稼八月瀛莫  
州大水損民田三年六月壽州大水端拱元年二月  
博州水害民田五月英州江水漲五丈壞民田及廬  
舍數百區七月磁州漳滏二水漲淳化元年六月吉

州大雨江漲漂壞民田廬舍黃梅縣堀口湖水漲壞  
民田廬舍皆盡江水漲二丈八尺洪州漲壞州城三  
十堵民廬舍二千餘區漂二千餘戶孟州河漲二年  
四月京兆府河漲陝州河漲壞大堤及五龍祠六月  
乙酉溢于浚儀縣壞連堤浸民田上親臨視督衛士  
塞之辛卯又決于宋城縣博州大霖雨河漲壞民廬  
舍八百七十區亳州河溢東流汎民田廬舍七月齊  
州明水漲壞黎濟砦城百餘堵許州沙河溢雄州塘  
水溢害民田殆盡嘉州江漲溢入州城毀民舍復州  
蜀漢二江水漲壞民田廬舍泗州招信縣大雨山河

漲漂浸民田廬舍死者二十一人八月藤州江水漲十餘丈入州城壞官署民田九月邛州蒲江等縣山水暴漲壞民舍七十區死者七十九人是秋荆湖北路江水注溢浸田畝甚衆三年七月河南府洛水漲壞七里鎮國二橋又山水暴漲壞豐饒務官舍民廬死者二百四十人十月上津縣大雨河水溢壞民舍溺者三十七人四年六月隴城縣大雨牛頭河漲二十丈沒溺居人廬舍九月澶州河漲衝陷北城壞居人廬舍官署倉庫殆盡民溺死者甚衆梓州玄武縣涪河漲二丈五尺壅下流入州城壞官私廬舍萬餘

區溺死者甚衆十月澶州河決水西北流入御河浸  
大名府城知府趙昌言壅城門禦之至道元年四月  
甲辰京師大雨雷電道上水數尺五月虔州江水漲  
二丈九尺壞城流入深八尺毀城門二年六月河南  
瀍澗洛三水漲壞鎮國橋七月建州溪水漲溢入州  
城壞倉庫民舍萬餘區鄆州河漲壞連堤四處宋州  
汴河決穀熟縣閏七月陝州河漲是月廣南諸州並  
大雨水咸平元年七月侍禁閣門祗候王壽永使彭  
州回至鳳翔府境山水暴漲家屬八人溺死齊州清  
黃河泛溢壞田廬二年十月漳州山水泛溢壞民舍

千餘區民黃擎等十家溺死三年三月梓州江水漲壞民田五月河決鄆州王陵埽七月洋州漢水溢民有溺死者四年七月同州洿谷水溢夏陽縣溺死者數十人五年二月雄霸瀛莫深滄諸州乾寧軍水壞民田六月京師大雨漂壞廬舍民有壓死者積潦浸道路自朱雀門東抵宣化門尤甚皆注惠民河河復漲溢軍營景德元年九月宋州汴水決浸民田壞廬舍河決澶州橫隴埽二年六月寧州山水泛溢壞民舍軍營多溺死者三年七月應天府汴水決南注亳州合浪宕渠東入于淮八月青州山水壞石橋四年

六月鄭州索水漲高四丈許漂滎陽縣居民四十二戶有溺死者鄧州江水暴漲南劍州山水泛溢漂溺居人七月河溢澶州壞王八埽八月橫州江漲壞營舍大中祥符元年六月開封府尉氏縣惠民河決二年七月徐濟青淄大水八月鳳州大水漂溺民居十月京畿惠民河決壞民田三年六月吉州臨江軍並江水泛溢害民田九月河決河中府白浮梁村四年七月洪江筠袁州江漲害民田壞州城八月河決通利軍大名府御河溢合流壞府城害田人多溺死九月河溢于孟州溫縣蘇州吳江汎溢壞廬舍十一月

楚泰州潮水害田人多溺者五年正月河決棣州聶  
家口七月慶州淮安鎮山暴漲漂溺居民六年六月  
保安軍積雨河溢浸城壘壞廬舍判官趙震溺死又  
兵民溺死凡六百五十人七年六月泗州水害民田  
河南府洛水漲秦州定西砦有溺死者八月河決澶  
州十月濱州河溢于定鎮八年七月坊州大雨河溢  
民有溺死者九年六月秦州獨孤谷水壞長道縣鹽  
官鎮城橋及官廨民舍二百九十五區溺死六十七  
人七月延州洎定平安塞門榜柵四砦山水泛溢壞  
堤城九月雄霸州界河泛溢利州水漂棧閣萬二千

八百間天禧三年六月河決滑州城西南漂沒公私  
廬舍死者甚衆歷澶州濮鄆濟單至徐州與清河合  
浸城壁不沒者四板明年既塞六月復決于西北隅  
乾興元年正月秀州水災民多艱食十月己酉夜滄  
州鹽山無棣二縣海潮溢壞公私廬舍溺死者甚衆  
是歲京東淮南路水災天聖初徐州仍歲水災三年  
十一月辛卯襄州漢水壞民田四年六月丁亥劍州  
邵武軍大水壞官私廬舍七千九百餘區溺死者百  
五十餘人是月河南府鄭州大水十月乙酉京山縣  
山水暴漲漂死者衆縣令唐用之溺焉是歲汴水溢

決陳留堤又決京城西賈陂入護龍河以殺其勢五年三月襄潁許汝等州水七月辛丑泰州鹽官鎮大水民多溺死六年七月壬子江寧府楊真潤三州江水溢壞官私廬舍是月雄霸州大水八月甲戌臨潼縣山水暴漲民溺死者甚衆是月河決楚王埽七年六月河北大水壞澶州浮橋明道元年四月壬子大名府冠氏等八縣水浸民田景祐元年閏六月甲子泗州淮汴溢七月澶州河決橫隴埽八月庚午洪州分寧縣山水暴發漂溺居民二百餘家死者三百七十餘口三年六月虔吉諸州久雨江溢壞城廬人多

溺死四年六月乙亥杭州大風雨江潮溢岸高六尺  
壞堤千餘丈八月甲戌越州大水漂溺居民寶元元  
年建州自正月雨至四月不止谿水大漲入州城壞  
民廬舍溺死者甚衆康定元年九月甲寅滑州大河  
泛溢壞民廬舍慶曆元年三月汴流不通八年六月  
乙亥河決澶州商胡埽是月恒雨七月癸丑衛州大  
雨水諸軍走避數日絕食是歲河北大水皇祐元年  
二月甲戌河北黃御二河決並注于乾寧軍河朔頻  
年水災二年鎮定復大水並邊尤被其害三年七月  
辛酉河決館陶縣郭固口八月汴河絕流四年八月

鄜州大水壞軍民廬舍嘉祐二年六月開封府界及京東西河北水潦害民田自五月大雨不止水冒安上門門關折壞官私廬舍數萬區城中繫柂渡人七月京東西荆湖北路水災淮水自夏秋暴漲環浸泗州城是歲諸路江河決溢河北尤甚民多流亡三年七月京索廣濟河溢浸民田五年七月蘇湖二州水災六年七月乙酉泗州淮水溢七年六月代州大雨山水暴入城七月寶州山水壞城河決北京第五埽治平元年慶許蔡潁唐泗濠楚廬壽杭宣鄂洪施渝州光化軍水九月陳州水災二年八月庚寅大雨地

上涌水壞官私廬舍漂人民畜產不可勝數是日御  
崇政殿宰相而下朝參者十數人而已詔開西華門  
以洩宮中積水水奔激殿侍班屋皆摧沒人畜多溺  
死官為葬祭其無王者千五百八十人熙寧元年秋  
霸州山水漲溢保定軍大水害稼壞官私廬舍城壁  
漂溺居民河決恩冀州漂溺居民二年八月河決滄  
州饒安漂溺居民移縣治於張為村泉州大風雨水  
與潮相衝泛溢損田稼漂官私廬舍四年八月金州  
大水毀城壞官私廬舍七年六月熙州大雨洮河泛  
溢八年四月潭衡邵道諸州江水溢壞官私廬舍九

年七月太原府汾河夏秋霖雨水大漲十月海陽潮  
陽二縣海潮溢壞廬舍溺居民十年七月河決曹村  
下埽澶淵絕流河南徙又東匯于梁山張澤濬凡壞  
郡縣四十五官亭民舍數萬田三十萬頃洛州漳河  
決注城大雨水二丈河陽河水湍漲壞南倉溺居民  
滄衛霖雨不止河濬暴漲敗廬舍損田苗元豐元年  
章丘河水溢壞公私廬舍城壁漂溺民居舒州山水  
暴漲浸官私廬舍損田稼溺居民四年四月澶州臨  
河縣小吳河溢北流漂溺居民五月淮水泛漲五年  
秋陽武原武二縣河決壞田廬七年六月青田縣大

水損田稼七月河北東西路水北京館陶水河溢入  
府城壞官私廬舍八月趙邢洛磁相諸州河水汎溢  
壞城郭軍營是年相州漳河決溺臨漳縣居民懷州  
黃沁河泛溢大雨水損稼壞廬舍城壁磁州諸縣鎮  
夏秋漳滏河水泛溢臨漳縣斛律口決壞官私廬舍  
傷田稼損居民元祐四年夏秋霖雨河流泛漲八年  
自四月雨至八月晝夜不息畿內京東西淮南河北  
諸路大水詔開京師宮觀五日所在州令長吏祈禱  
宰臣呂大防等待罪紹聖元年七月京畿久雨曹濮  
陳蔡諸州水害稼元符元年河北京東等路大水二

年六月久雨陝西京西河北大水河溢漂人民壞廬  
舍是歲兩浙蘇湖秀等州尤罹水患大觀元年夏京  
畿大水詔工部都水監疏導至于八角鎮河北京西  
河溢漂溺民戶十月蘇湖水災二年秋黃河決陷沒  
邢州鉅鹿縣三年七月階州久雨江溢四年夏鄆州  
大水漂沒順陽縣政和五年六月江寧州太平宣州  
水災八月蘇湖常秀諸郡水災七年瀛滄州河決滄  
州城不沒者三版民死者百餘萬重和元年夏江淮  
荆浙諸路大水民流移溺者衆分遣使者振濟發運  
使任諒坐不奏泗州壞官私廬舍等勒停宣和元年

五月大雨水驟高十餘丈犯都城自西北奔馳岡連  
萬勝門外馬監居民盡沒前數日城中井皆渾宣和  
殿後井水溢蓋水信也至是詔都水使者決西城索  
河堤殺其勢城南居民冢墓俱被浸遂壞藉田親耕  
之稼水至溢猛直冒安上南薰門城守凡半月已而  
入汴汴渠將溢於是募人決下流由城北入五丈河  
下通梁山樂乃平十一月東南州縣水災四年十二  
月戊戌詔訪聞德州有京東西來流民不少本州振  
濟有方令保奏推恩餘路遇有流移不即存恤按劾  
以聞六年秋京畿恒雨河北京東兩浙水災民多流

移建炎二年春東南郡國水紹興二年閏月徽嚴州  
水害稼三年七月丙子泉州水三日壞城郭廬舍五  
年秋西川郡國水六年冬饒州雨水壞城四百餘丈  
十四年五月丙寅婺州水乙丑蘭溪縣水侵縣市丙  
寅夜水暴至死者萬餘人十六年潼川府東南江  
溢水入城浸民廬十八年八月紹興府明婺州水二  
十二年淮甸水二十三年金堂縣大水潼川府江溢  
浸城内外民廬宣州大水其流泛溢至太平州七月  
光澤縣大雨溪流暴湧平地高十餘丈人避不及者  
皆溺半時即平二十七年鎮江建康紹興府真太平

池江洪鄂州漢陽軍大水二十八年六月丙申興利  
二州及大安軍大雨水流民廬壞橋棧死者甚衆九  
月江東淮南數郡水浙東西沿海郡縣大風水平  
江紹興府湖常秀潤為甚二十九年七月戊戌福州  
水入城閩候官懷安三縣壞田廬官吏不以聞憲臣  
樊光遠坐黜三十年五月辛卯夜於潛臨安安吉三  
縣山水暴出壞民廬田桑溺死者甚衆三十一年八  
月建始縣大水流民廬死者甚衆三十二年四月淮  
溢數百里漂民田廬死者尤衆六月浙西郡縣山涌  
暴水漂民舍壞田覆舟隆興元年八月浙東西州縣

大風水紹興平江府湖州及崇德縣為甚二年七月  
平江鎮江建康寧國府湖常秀池太平廬和光州江  
陰廣德壽春無為軍淮東郡皆大水浸城郭壞廬舍  
圩田軍壘操舟行市者累日人溺死甚衆越月積陰  
苦雨水患益甚淮東有流民乾道元年六月常湖州  
水壞圩田二年八月丁亥溫州大風海溢漂民廬塗  
場龍朔寺覆舟溺死二萬餘人江濱齒骼尚七千餘  
三年六月廬舒蘄州水壞苗稼漂人畜七月己酉臨  
安府天目山湧暴水決臨安縣五鄉民廬二百八十  
餘家人多溺死八月湖秀州上虞縣水壞民田廬時

積潦至于九月禾稼皆腐江東山水溢江西諸郡水  
隆興府四縣為甚四年七月壬戌衢州大水敗城三  
百餘丈漂民廬孳牧壞禾稼諸暨縣大水害稼江寧  
建康府水是歲饒信亦水五年七月丁巳建寧府瑞  
應場大漈山棗等山暴水湧出漂民廬溺死甚衆是  
歲夏秋溫台州凡三大風水漂民廬壞田稼人畜溺  
死者甚衆黃巖縣為甚郡守王之望陳巖肖不以聞  
皆黜削六年五月平江建康寧國府溫湖秀太平州  
廣德軍及江西郡大水江東城市有深丈餘者漂民  
廬湮田稼潰圩隄人多流徙八年五月贛州南安軍

山水暴出及隆興府吉筠州臨江軍皆大雨水漂民  
廬壞城郭潰田害稼六月壬寅四川郡縣大雨水嘉  
眉邛屬州永康軍及金堂縣尤甚漂民廬決田畝九  
年五月戊午建康隆興府嚴吉饒信池太平州廣德  
軍水漂民居壞圩湮田分水縣沙塞四百餘畝采石  
流民多渡江六月湖北郡縣水淳熙元年七月壬寅  
癸卯錢塘大風濤決臨安府江隄一千六百六十餘  
丈漂居民六百三十餘家仁和縣瀕江二鄉壞田圃  
三年八月辛巳台州大風雨至于壬午海濤溪流合  
激為大水決江岸壞民廬溺死者甚衆癸未行都大

雨水壞德勝江漲北新三橋及錢塘餘杭仁和縣田  
流入湖秀州害稼浙東西江東郡縣多水婺州會稽  
嵊廣德軍建平三縣尤甚四年五月庚子建寧府福  
南劍州大雨水至于壬寅漂民廬數千家己亥夜錢  
塘江濤大溢敗臨安府隄八十餘丈庚子又敗隄百  
餘丈文明州瀕海大風海濤敗定海縣隄二千五百餘  
丈鄞縣隄五千一百餘丈漂沒民田九月丁酉戊戌  
大風雨駕海濤敗錢塘縣隄三百餘丈餘姚縣溺死  
四十餘人敗隄二千五百六十餘丈敗上虞縣隄及  
梁湖堰及運河岸定海縣敗隄二千五百餘丈鄞縣

敗隄五千一百餘丈五年六月戊辰古田縣大水漂民廬圮縣治市橋閏月己亥階州水壞城郭乙巳興化軍及福清縣及海口鎮大水漂民廬官舍倉庫溺死者甚衆六年夏衢州水秋寧國府溫台湖秀太平州水壞圩田樂清縣溺死者百餘人七年五月戊戌分宜縣大水決田害稼八年五月壬辰嚴州大水漂浸民居萬九千五百四十餘家壘舍六百八十餘區紹興府大水五縣漂浸民居八萬三千餘家田稼盡腐漁浦敗隄五百餘丈新林敗隄通運河是歲徽江二州亦水十年五月辛巳信州大水入城沈廬舍市

井襄陽府大水漂民廬蓋藏為空江東浙東數郡亦  
水八月辛酉雷州大風激海濤沒瀕海民舍死者甚  
衆九月乙丑福潭州大風雨水暴至長溪寧德縣瀕  
溪聚落廬舍人舟皆漂入海漳城半沒浸八百九十  
餘家丁卯吉州龍泉縣大水漂民廬壞田畝溺死者  
衆十一年四月和州水涇民廬壞圩田五月丙申階  
州白江水溢決隄圮城浸民廬壘舍祠廟寺觀甚多  
建康府太平州水六月甲申處州龍泉縣大雨水浸  
民舍壞杠梁匯田害稼七月壬辰明州大風雨山水  
暴出浸民市圯民廬覆舟殺人十二年六月婺州及

富陽縣皆水浸民廬害田稼八月戊寅安吉縣暴水  
發棗園村漂廬舍寺觀壞田稼殆盡溺死千餘人郡  
守劉藻不以聞坐黜是歲鄂州自夏徂冬水浸民廬  
九月台州水十四年三月辛未汀州水漂百餘家軍  
壘六十餘區十五年五月淮甸大雨水淮水溢廬濠  
楚州無為安豐高郵盱眙軍皆漂廬舍田稼廬州城  
圮荆江溢郢州大水漂軍民壘舍三千餘江陵常德  
德安府復岳澧州漢陽軍水戊午祈門縣群山暴匯  
為大水漂田禾廬舍冢墓桑麻人畜什六七浮齒甚  
衆餘害及浮梁縣六月建寧隆興府袁撫州臨江軍

水圮民廬七月黃巖縣水敗田澑番易湖溢番易縣  
漂民舍田稼有流徙者十六年四月甲戌紹興府新  
昌縣山水暴作害稼涇田漂民廬五月丙辰元靖州  
山水暴溢至辰州常德府城沒一丈五尺漂民廬舍  
汀州大水浸民廬千五百餘家溺死三千人分宜縣  
水丁巳階州白江水溢浸城市民廬六月庚寅鎮江  
府大雨水五日浸軍民壘舍三千餘辛卯潼川府東  
南二江溢決隄毀橋浸民廬涪城中江射洪通泉郪  
縣沒田廬紹熙二年三月寧化縣連水漂廬舍田畝  
溺死二十餘人五月戊申建寧州水已酉福州水浸

附郭民廬懷安候官縣漂千三百餘家古田閩清縣亦壞田廬庚午利州東江溢壞隄田廬舍辛未潼川府東南江溢六月戊寅又溢再壞隄橋水入城沒廬舍七百四十餘家鄰涪射洪通泉縣匯田為江者千餘畝七月癸亥嘉陵江暴溢興州圮城門郡獄官舍凡十七所漂民居三千四百九十餘潼川崇慶府縣果合金龍漢州懷安石泉大安軍魚闡皆水時上流西蕃界古松州江水暴溢龍州敗橋閣五百餘區江油縣溺死者衆三年五月壬辰常德府大雨水浸民田廬乙未潼川府東南江溢後六日又溢浸城外民

廬人徙於山己亥池州大雨水連夕青陽縣山水暴  
湧漂田廬殺人蓋藏無遺貴池縣亦水庚子涇縣大  
雨水敗堤圮縣治廬舍六月辛丑建平縣水敗堤入  
城漂浸民廬甲戌祈門縣水七月壬申天台仙居縣  
大水連夕漂浸民居五百六十餘壞田傷稼襄陽江  
陵府大雨水漢江溢敗堤防圮民廬沒田稼者逾旬  
復州荆門軍水亦如之鎮江府三縣水損下地之稼  
四年四月上高縣水浸二百餘家五月壬申癸酉奉  
新縣大雷雨水漂浸八百二十餘家五月辛未丙子  
鎮江府大雨水浸營壘六千餘區戊寅安豐軍大水

平地三丈餘漂田廬絲麥皆空是月諸暨蕭山宣城寧國縣大水壞田稼廣德軍屬縣水害稼筠州水浸民廬戊寅進賢縣水圮百二十餘家六月丙申興國軍水池口鎮及大冶縣漂民廬有溺死者戊戌靖安縣水漂三百二十餘家是夏江贛州江陵府亦水七月乙酉豐城縣水壬午臨江軍永皆圮民廬丁亥新淦縣漂浸二千三百餘家八月辛丑隆興府水圮千二百七十餘家吉州水漂浸民廬及泰和縣官舍自夏及秋江西九州三十七縣皆水是歲興化軍大風激海濤漂沒田廬尤多五年五月辛未石埭貴池涇

縣皆水圯民廬溺死者衆是月泰州大水七月壬申  
慈溪縣水漂民廬決田害稼人多溺死乙亥會稽山  
陰蕭山餘姚上虞縣大風駕海濤壞墻傷田稼八月  
辛丑錢塘臨安新城富陽於潛縣大雨水餘杭縣尤  
甚漂沒田廬死者無筭安吉縣水平地丈餘平江鎮  
江寧國府明台溫嚴常州江陰軍皆水是秋武陵縣  
江溢圯田廬甚衆慶元元年六月壬申台州及屬縣  
大風雨山洪海濤並作漂沒田廬無筭死者蔽川漂  
沉旬日至十七月甲寅黃巖縣水尤甚常平使者莫  
漳以緩於振恤坐免七月臨安府水二年秋浙東郡

國大水三年九月紹興府屬縣二婺州屬縣二水害稼五年秋台溫衢婺水漂民廬人多溺死衢守張經以匿災恠振坐黜六年五月建寧府嚴衢婺饒信徽南劍州及江西郡縣皆大水自庚午至于甲戌漂民廬害稼嘉泰二年七月丙午上杭縣水圮田廬壞稼民多溺死建安縣漂軍民廬舍百二十餘山摧覆民廬七十七家溺壓死者六十餘丁未長溪縣漂民廬二百八十餘家古田縣漂官舍民廬甚衆溺死者二百七十劍浦縣圮三百五十餘家死者亦衆三年四月江南郡邑水害稼開禧元年九月丙戌漢淮水溢

荆襄淮東郡國水楚州盱眙軍為甚圮民廬舍稼二  
年五月庚寅東陽縣大水山千七百三十餘所同夕  
崩洪漂聚落五百四十餘所湮田二萬餘畝溺死者  
甚衆三年江浙淮郡邑水鄖州漢陽軍尤甚嘉定二  
年五月己亥連州大水敗城郭百餘丈沒官舍郡庠  
民廬壞田畝聚落甚多六月辛酉西和州水沒長道  
縣治倉庫丙子昭化縣水沒縣治漂民廬成州水入  
城圯壘舍同谷縣及遂寧府閬州皆水七月壬辰台  
州大風雨激海濤漂圮二千二百八十餘家溺死尤  
衆三年四月甲子新城縣大水五月嚴衢婺徽州富

陽餘杭塩官新城諸暨淳安大雨水溺死者衆圮田  
廬市郭首種皆腐行都大水浸廬舍五千三百禁旅  
壘舍之在城外者半沒西湖溢四年七月辛酉慈溪  
縣大水圮田廬人多溺者八月山陰縣海敗堤漂民  
田數十里斥地十萬畝五年五月庚戌嚴州水六月  
丁丑台州及建德諸暨會稽縣水壞田廬六年六月  
丁丑淳安縣山漏暴水陷清泉寺漂五鄉田廬百八  
十里溺死者無筭巨木皆拔丁亥於潛縣大水戊子  
諸暨縣風雷大雨山漏暴作漂十鄉田廬溺死者尤  
多錢塘縣臨安餘杭於潛安吉縣皆水九年五月行

都及紹興府嚴衢婺台處信饒福漳泉州興化軍大  
水漂田廬害稼十年冬浙江濤溢圯廬舍覆舟溺死  
甚衆蜀漢二州江沒城郭十一年六月戊申武康吉  
安縣大水漂官舍民廬壞田稼人畜死者甚衆十二  
年益官縣海失故道潮汐衝平野三十餘里至是侵  
縣治廬州港瀆及上下管黃灣岡等鹽場皆圯蜀山  
淪入海中聚落田疇失其半壞四郡田後六年始平  
十四年建康府大水十五年七月蕭山縣大水時久  
雨衢婺婺嚴暴流與江濤合圯田廬害稼十六年五  
月江浙淮荆蜀郡縣水平江府湖常秀池鄂楚太平

州廣德軍為甚漂民廬舍稼圯城郭隄防溺死者衆  
鄂州江湖合漲城市沈沒累月不泄是秋江溢圯民  
廬餘杭錢塘仁和縣大水福漳泉州興化軍水壞稼  
十五六十七年五月福建大水漂水口鎮民廬皆盡  
候官縣甘蔗砦漂數百家人多溺死建寧府沒平政  
橋入城南劍州圮郡治城樓郡獄官舍城壞民避水  
樓上者皆死乙卯建昌軍大水城不沒者三板漂民  
廬圯官舍城郭橋梁害稼紹定二年天台仙居縣大  
水四年沿江水災端平三年三月辛酉蘄州大雨水  
漂民居是年英德府昭州及襄漢江皆大水嘉熙元

年饒信州水二年浙江溢淳祐二年紹興府處婺州  
水七年福建水十年嚴州水十一年八月甲辰汀州  
山水暴至漂人民九月江陵水是年江浙多水饒州  
亦水十二年六月建寧府嚴衢婺信台處南劍州邵  
武軍大水冒城郭漂室廬死者以萬數寶祐元年七  
月溫台處信饒州大水開慶元年五月己未婺州水  
漂民廬是歲滁嚴州水景定二年浙東水咸淳六年  
五月大雨水七年五月甲申諸暨縣大水漂廬舍是  
月重慶府江水泛溢者三漂城壁壞樓櫓十年三月  
廬州水四月紹興府大雨水八月臨安府水安吉武

# 康縣水

太平興國四年八月滑州黎陽縣河清端拱元年二月澶濮二州河清二百餘里大中祥符三年十一月丁酉陝西河清十二月乙巳河再清當汾水合流處清如汾水元豐四年十月環州河水變甘大觀元年八月乾寧軍河清二年十二月陝州河清同州韓城縣郃陽縣至清及百里涉春不變自是迄政和宣和諸路數奏河清輒遣郎官致祭宰臣等率百官拜表賀歲以為常

大中祥符元年二月醴泉出蔡州汝陽鳳原鄉有疾

者飲之皆愈八年十一月通州軍言醴泉出汶山下  
有疾者飲之皆愈熙寧元年五月京師開化坊醴泉  
出政和五年正月河陽臺觀醴泉出

志卷第十四

字六千个

卷之二

五

美 刊

志卷第十五

宋史六十二

開府儀同三司樞密院掌書前書吏丞相纂修國史領經筵事都總裁張曉松等奉  
勅修

五行一下 水下

建隆三年春延寧二州雪盈尺溝洫復冰草木不華  
丹州雪二尺太平興國七年三月宣州霜雪害桑稼  
雍熙二年冬南康軍大雨雪江水冰勝重載端拱元  
年閏五月鄆州風雪傷麥淳化三年九月京兆府大  
雪殺苗稼四年二月商州大雪民多凍死咸平四年  
三月丁丑京師及近畿諸州雪損桑天禧元年十二

月京師大雪苦寒人多凍死路有僵尸遣中使埋之  
四郊二年正月永州大雪六晝夜方止江陵溪魚皆  
凍死慶曆三年十二月丁巳大雨雪至祐四年十二  
月己丑雪初帝以愆亢責躬減膳每見輔臣憂形於  
色龐籍等因言臣等不能燮理陰陽而上煩陛下責  
躬引咎願守散秩以避賢路帝曰是朕誠不能感天  
而惠不能及民非卿等之過也是夕乃得雪至和元  
年正月京師大雪貧弱之民凍死者甚衆嘉祐元年  
正月甲寅朔御大慶殿受朝前一夕殿庭設仗衛既  
具而大雨雪折宮架是日帝因感風眩促禮行而罷

壬午大雨雪泥塗盡水都民寒餓死者甚衆元祐二年冬京師大雪連月至春不止久陰恒寒罷上元節游幸降德音諸道八年十一月京師大雪多流民元符二年正月甲辰朔御大慶殿受朝賀以雪罷政和三年十一月大雨雪連十餘日不止平地八尺餘冰滑人馬不能行詔百官乘轎入朝飛鳥多死七年十二月大雪詔收養內外乞丐老幼靖康元年閏十一月大雪盈三尺不止天地晦冥或雪未下時陰雲中有雪絲長數寸墮地二年正月丁酉大雪天寒甚地冰如鏡行者不能定立是月乙卯車駕在青城大雪

數尺人多凍死建炎三年六月寒紹興元年二月寒食日雪五年二月乙巳雨雪六年二月癸卯雪十三年三月癸丑雨雪十七年二月丙申雪十八年二月癸卯雪二十八年三月丙寅雨雪二十九年二月戊戌大雪三十一年正月戊子大雨雪至于己亥禁旅壘舍有壓者寒甚乾道元年二月大雪三月暴寒損苗稼二年春大雨寒至于三月損蠶麥二月丙申雪四年二月癸丑大雪五年二月戊子雪六年五月大風雨寒傷稼七年二月丙辰雨雪淳熙十二年淮水冰斷流是冬大雪自十二月至明年正月或雪或霰

或雹或雨水冰汎尺餘連日不解台州雪深丈餘凍死者甚衆十六年四月戊子天水縣大雨雪傷麥紹熙元年三月留寒至立夏不退十二月建寧府大雪深數尺查源洞寇張海起民避入山者多凍死二年正月行都大雪積汎河水厚尺餘寒甚是春雷雪相繼凍雨彌月四年二月己未雪慶元五年二月庚午雪六年二月乙酉雪五月暑氣凜如秋開禧三年二月戊申雪嘉定元年二月甲寅雪四年二月丙子雪六年二月丁亥雪六年六月亡暑夜寒九年二月乙酉丙申雪十年二月庚申壬戌雪十七年三月癸丑雪

寶慶元年四月辛卯雪紹定四年二月己巳雨雪六年三月壬子雨雪端平元年二月癸酉雨雪二年三月乙未雨雪嘉熙二年二月乙未雨雪淳祐六年二月壬申雨雪寶祐元年二月壬子雨雪二年三月戊子雨雪六年二月雨雪開慶元年二月庚辰雨雪景定五年二月辛亥雨雪

建隆三年春厭次縣隕霜殺桑民不蠶淳化三年三月商州霜花皆死景德四年七月渭州瓦亭砦早霜傷稼大中祥符九年十二月大名澶相州並霜害稼至和二年河東自春隕霜殺桑紹興七年二月庚申

霜殺桑稼淳熙十六年七月階城鳳泗和州霜殺稼  
幾盡紹熙三年九月丁未和州隕霜連三日殺稼是  
月淮西郡國稼皆傷嘉熙元年三月霜

建隆元年十月臨清縣雨雹傷稼二年七月義川雲  
岩二縣大雨雹四年七月海州風雹乾德二年四月  
陽武縣雨雹宋州寧陵縣風雨雹傷民田六月潞州  
風雹七月同州郃陽縣雨雹害稼八月膚施縣風雹  
霜害民田三年四月尉氏扶溝二縣風雹害民田桑  
棗十損七八開寶二年風雹害夏苗太平興國二年  
六月景城縣雨雹七月永定縣大風雹害稼五年四

月冠氏安豐二縣風雹七年五月蕪湖縣雨雹傷稼  
八年五月相州風雹害民田端拱元年三月霸州大  
雨雹殺麥苗閏五月潤州雨雹傷麥淳化元年六月  
許州大風雹壞軍營民舍千一百五十六區魚臺縣  
風雹害稼至道二年十一月代州風雹傷田稼咸平  
元年九月定州北平等縣風雹傷稼三年四月丁巳  
京師雨雹飛禽有隕者六年四月甲申京師暴雨雹  
如彈丸大中祥符三年丙申京師雨雹五年八月丙  
辰京師雨雹天禧元年九月鎮戎軍彭城砦風雹害  
民田八百餘畝天聖元年五月丙辰大雨雹二年七

月壬午大雨雹六年京師雨雹嘉祐四年四月丙戌  
震雷雨雹熙寧元年秋鄜州雨雹三年七月七年四  
月五月京師雨雹八年夏鄜州涇州雨雹九年二月  
京師雨雹十年夏鄜州雨雹秦州大雨雹紹聖二年  
十月辛未西南方有雷聲次大雨雹四年閏二月癸  
卯京師雨雹自辰至申建中靖國元年二月丙申京  
師雨雹五月辛酉京師大雨雹崇寧三年十月辛丑  
京師雨雹大觀元年十月己巳三年五月戊申京師  
大雨雹政和七年六月京師大雨雹皆如拳或如一  
升器幾兩時而止宣和四年二月癸卯京師雨雹四

年三月朔雨雹靖康元年十二月己卯庚辰京師雨  
雹建炎三年八月甲戌大雨雹紹興元年二月壬辰  
高宗在越州雨雹震雷二月丙子臨安府大雨  
雹三年正月雨雹震雷四年三月己未大雨雹傷稼  
五年閏月乙巳朔雨雹而雪十月丁未夜秀州華亭  
縣大風電雨雹大如荔枝實壞舟覆屋十二月戊辰  
雨雹七年二月癸丑雨雹先一夕雷後一日雪癸丑  
又雹八年六月丙辰大雨雹九年二月甲戌雨雹傷  
麥十二月辛未雨雹十年二月辛亥大雨雹十二月  
庚辰雨雹十一年正月辛酉雨雹十三年二月甲子

雨雹傷麥五月戊午夜雹七月庚午壬申雹害稼十一月己未雨雹十七年正月庚辰雨雹五月丙寅又雹二十一年三月己卯雹傷禾麥二十八年四月辛亥雨雹二十九年二月戊戌雹損麥隆興元年三月丙申夜雨雹二年二月丁丑雹與霰俱四月庚午雹六月雨雹七月丁未雨雹十月辛卯雨雹十二月己亥雨雪而雹閏月雨雹乾道元年二月庚寅夜雹二年十月辛卯雨雹三年二月壬午雪癸未雹四年正月癸未夜雹有霰二月丁酉癸丑雨雹乙卯雹而雪五年二月丙午雹損麥六年二月壬午亦如之八年

七月壬辰雨雹淳熙三年四月丁亥雨雹癸巳天台  
臨海二縣大風雹傷麥四年正月建康府雨雹五月  
丙寅雨雹五年建康府雨雹者再六年正月丁丑雹  
傷麥三月壬申夜大雨雹八年十二月甲寅雨雹十  
二年二月辛酉夜雨雹十三年閏月丙午雨雹十五  
年二月丁亥雨雪而雹六年丁卯雨雹十六年二月  
己卯雹而雨紹熙元年二月丙申雪丁酉雹二年正  
月戊寅大雨雹震雷電以雨至二月庚辰大雪連數  
日是月庚寅朔建寧府大風雨雹仆屋殺人三月癸  
酉大風雨雹大如桃李實平地盈尺壞廬舍五千餘

家禾麻蔬果皆損瑞安縣亦如之壞屋殺人尤衆秋  
祐川縣大風雹壞粟麥慶元三年二月戊辰雪已巳  
雹四月乙丑雨雹大如梧破瓦殺燕爵嘉泰元年三  
月丙寅雨雹三日五月丁丑雨雹七月癸亥大雨而  
雹二年四月庚寅雨雹傷稼六月庚子大風雹而寒  
四年正月壬辰雪而雹開禧二年正月己酉雹而雷  
嘉定元年閏月壬申雨雹害稼二年三月乙未雨雹  
六年夏江浙郡縣多雨雹害稼十五年九月癸丑大  
震雨雹十六年秋雨雹紹定元年五月丁酉雨雹五  
年九月壬寅雨雹六年三月丙辰大雨雹端平二年

五月乙未雹三年六月庚戌雨雹嘉熙元年二月壬辰雨雹淳祐二年四月壬申雨雹八年二月壬辰雨雹三月乙丑雨雹九年正月雨雹寶祐三年五月嘉定府大雨雹開慶元年五月辛亥雨雹景定元年二月庚申雨雹

建隆四年四月癸巳宿州晝日無雨雷霆暴作軍校傅韜震死是夜夜半雷起于京師開封縣署役夫劉延嗣萬進震死頃之復蘇有煙焰自牖入室因駭仆徧體焦灼乾德二年正月辛巳雷起京師西南東行有電五月戊寅大名府大雨雷震焚焚聚四年七月海

州雷震長吏廳傷刺史梁彥超開寶七年六月易州  
雷震死耀武軍士八人八年八月卽州延貴鎮震死  
民費貴及其子四人太平興國二年七月景城縣震  
死牛商馮異端拱二年八月興化軍民劉政震死有  
文在曾曰大不孝淳化三年七月泗州大風雨震僧  
伽塔柱至道元年三月甲戌雷未發聲召司天監寺  
趙昭問之答云按占書雷不發聲寬政之應也七月  
泗州大風雨雷震僧伽塔及壞鍾樓咸平元年正月  
戊寅京師西北有雷電十一月瀛州順安軍並東北  
有雷三年冬黃州西北雷震似盛夏時十二月真定

府東南雷四年十月乙巳京師西南雷電閏十二月  
大名府雷六年十一月甲午京師暴雷震司天言國  
家發號布德未及黎庶時議改元肆赦詔宰相增廣  
條目采民病悉除之景德三年九月丙寅夕京師大  
震雷大中祥符元年正月癸未京師西北方雷五年  
十二月己巳京師西北雷電九年五月殿中張信奉  
南海祝版乘驛至唐州震死嘉祐四年四月丙戌大  
震雷雨雹慶曆六年五月雷雹地震紹聖三年十月  
十五日西南方有雷聲次雨雹大觀三年十月戊子  
大雷雹而雨建炎四年正月己未雷時御舟次溫州

章安鎮高宗謂宰臣曰雷聲甚厲前史以為君弱臣  
強四夷兵不制是夕金人破明州壬戌又雷紹興五  
年九月戊寅雷十月丁巳雷六年十月丙午雷九年  
九月甲午十月丁卯雷十一年十一月己酉雷十五  
年十月辛卯十二月甲寅雷十六年溫州大雷電震  
死六人於龍翔寺十八年閏月甲戌雷十九年十月  
甲寅雷二十一年二月辛未南安軍大雷電大庾縣  
震死四人十一月辛未夜震雷十二月癸酉雷二十  
二年十二月戊寅己卯雷二十六年十二月甲子雷  
二十七年九月癸未雷三十一年正月丁丑雷乾道

三年十一月丙寅雷雨不克郊戊辰日南至大震雷  
八年九月乙酉雷九年閏月癸卯雷淳熙九年九月  
壬午雷十二年十一月戊子雷十二月丁丑雷十三  
年正月己丑雷後三十五日雪十四年十一月乙卯  
雷十六年七月乙丑大雷震太室齋殿東鴟吻紹熙  
元年九月辛酉雷十一月壬午日南至郊祀風雨大  
至帝震恐因致疾四年十一月己卯日南至辛巳雷  
五年十月癸巳大雷電慶元二年正月戊子雷十一  
月雷三年十月癸亥雷六年九月己未雷嘉泰二年  
正月己巳雷三年正月雷四年正月辛卯雷開禧二

年正月雪雷九月雷三年十月辛未癸酉雷嘉定二  
年九月戊子雷三年正月雷十月壬申雷八月辛丑  
九月辛酉雷四年九月雷五年七月戊辰雷雨震太  
室之鴟吻十月丁酉雷六年閏月壬辰雷震電乙未  
昧爽游雷七年九月癸亥雷八年九月丙寅雷十一  
年九月辛巳祀明堂肆赦震雷十四年十月庚午雷  
十五年九月癸丑雷十六年九月乙卯十二月壬辰  
雷十七年九月丁亥雷寶慶三年九月庚申十月辛  
丑雷紹定二年九月庚辰雷五年九月壬寅雷端平  
二年十二月辛亥雷三年九月庚午雷是月祀明堂

大雨震電十月戊戌雷嘉熙元年九月丁巳雷二年  
九月己酉十月庚戌雷淳祐元年十二月丙寅雷二  
年九月己丑雷三年三月丙辰雷十年十一月壬午  
雷十二年十二月丁丑雷寶祐三年九月雷開慶元  
年十月乙酉雷景定二年十月戊戌雷電己亥雷電  
咸淳四年閏月丁巳九月庚申雷九年十月癸亥十  
二月丙辰壬戌雷建炎七年五月汴京無雲而雷紹  
興三十年十月壬戌晝漏半無雲而雷癸亥日過中  
無雲而雷淳熙十四年六月甲申昧爽禱雨太乙宮  
乘輿未駕有大聲自內發及和寧門人馬辟易相踐

有失巾屨者

至道元年十二月廣州大魚擊海水而出魚死長六丈三尺高丈餘政和七年夏中有二魚落殿中省廳屋上宣和二年三月內出魚純赤色蔡京等乞付史館拜表賀紹興十八年漳浦縣崇照塲場海岸連有巨魚高數丈割其肉數百車剜目乃覺轉鬚而傍艦皆覆又漁人獲魚長二丈餘重數千斤剖之腹藏人骼膚髮如生二十四年月海鹽縣海洋有巨鯢群鯢從之聲若謳歌抵岸偃沙上猶揚鬚撥刺其高齊縣門乾道六年行都北關有鮎魚色黑腹下出人手

於兩傍各具五指七年十一月丁亥洞庭湖巨龜走  
沙擁舟身廣長皆丈餘升舟以首足壓重艦沒水淳  
熙十三年二月庚申錢塘龍山江岸有大魚如象隨  
潮汐復逝十六年六月甲辰錢塘旁江居民得魚備  
五色鯽首鯉身民詭言妄得魚覺而在手猶躍事聞  
有司令縱之慶元三年二月饒州景德鎮漁人得魚  
頰尾鯉鱗而首異常魚鎮之老人言其不祥紹興二  
年嘗出後為水災蓋是歲五月鎮果大水皆魚孽也  
嘉定十七年海壞畿縣鹽官地數十里先是有巨魚  
橫海岸民鬻食之海患共六年而平

建隆元年七月澶州蝗二年五月范縣蝗三年七月  
深州蝻蟲生四年六月澶濮曹絳等州有蝗七月懷  
州蝗生乾德二年四月相州蝻蟲食桑五月昭慶縣  
有蝗東西四十里南北二十里是時河北河南陝西  
諸州有蝗三年七月諸路有蝗開寶二年八月冀磁  
二州蝗太平興國二年閏七月衛州蝻蟲生六年七  
月河南府宋州蝗七年四月北陽縣蝻蟲生有飛鳥  
食之盡滑州蝻蟲生是月大名府陝州陳州蝗七月  
陽穀縣蝻蟲生雍熙三年七月鄄城縣有蛾蝗自死  
淳化元年七月淄澧濮州乾寧軍有蝗滄州蝗蝻蟲

食苗棣州飛蝗自北來害稼三年六月甲申京師有  
蝗起東北趣至西南蔽空如雲翳日七月具許滄沂  
蔡汝商充單等州淮陽軍平定彭城軍蝗蛾抱草自  
死至道二年六月亳州宿密州蝗生食苗七月長葛  
陽翟二縣有蝻蟲食苗歷城長清等縣有蝗三年七  
月單州蝻蟲生景德二年六月京東諸州蝻蟲生三  
年八月德博嫁生四年九月宛丘東阿湏城三縣蝗  
大中祥符二年五月雄州蝻蟲食苗三年六月開封  
府尉氏縣蝻蟲生四年六月祥符縣蝗七月河南府  
及京東蝗生食苗葉八月開封府祥符咸平中牟陳

留雍丘封丘六縣蝗九年六月京畿京東西河北路  
蝗蝻繼生彌覆郊野食民田殆盡入公私廬舍七月  
辛亥過京師群飛翳空延至江淮南趣河東及霜寒  
始斃天禧元年二月開封府京東西河北河東陝西  
兩浙荆湖百三十州軍蝗蝻復生多去歲蟄者和州  
蝗生卵如稻粒而細六月江淮大風多吹蝗入江海  
或抱草木僵死二年四月江陰軍蝻蟲生天聖五年  
七月丙午邢洺州蝗甲寅趙州蝗十一月丁酉朔京  
兆府旱蝗六年五月乙卯河北京東蝗景祐元年六  
月開封府淄州蝗諸路募民掘蝗種萬餘石寶元二

年六月癸酉曹濮單三州蝗年淮南旱蝗是歲京師飛蝗蔽天皇祐五年建康府蝗熙寧元年秀州蝗五年河北大蝗六年四月河北諸路蝗是歲江寧府蝗自江北來七年夏開封府界及河北路蝗七月咸平縣鶴谷食蝗八年八月淮西蝗陳頴州蔽野九年夏開封府畿京東河北陝西蝗元豐四年六月河北蝗秋開封府界蝗五年夏又蝗六年夏又蝗五月沂州蝗元符元年八月高郵軍蝗抱草死崇寧元年夏開封府界京東河北淮南等路蝗二年諸路蝗令有司酺祭三年四年連歲大蝗其飛蔽日來自山東及

府界河北尤甚宣和三年諸路蝗五年蝗建炎二年六月京師淮甸大蝗八月庚午令長吏修酺祭紹興二十九年七月盱眙軍楚州金界三十里蝗為風所墮風止復飛還淮北三十二年六月江東淮南北郡縣蝗飛入湖州境聲如風雨自癸巳至于七月丙申徧于畿縣餘杭仁和錢塘皆蝗丙午蝗入京城八月山東大蝗癸丑頒祭酺禮式隆興元年七月大蝗八月壬申癸酉飛蝗過都蔽天日徽宣湖三州及浙東郡縣害稼京東大蝗襄隨尤甚民為乏食二年夏餘杭縣蝗乾道元年六月淮西蝗憲臣姚岳貢死蝗為

瑞以俟坐黜淳熙三年八月淮北飛蝗入楚州盱眙軍界如風雷者逾時遇大雨皆死稼用不害九年六月全椒歷陽烏江縣蝗乙卯飛蝗過都遇大雨墮仁和縣界七月淮甸大蝗真揚泰州害撲蝗五千斛餘郡或日捕數十車群飛絕江墮鎮江府皆害稼十年六月蝗遺種于淮浙害稼十四年七月仁和縣蝗紹熙二年七月高郵縣蝗至于泰州五年八月楚和州蝗嘉定二年浙西諸縣大蝗自丹陽入武進若煙霧蔽天其墮亘十餘里常之三縣捕八千餘石湖之長興捕數百石時浙東近郡亦蝗開禧三年夏秋久旱

大蝗群飛蔽天浙西豆粟皆既于蝗嘉定元年五月  
江浙大蝗六月乙酉有事于圜丘方澤且祭酺七月  
又酺頒酺式于郡縣二年四月又蝗五月丁酉令諸  
郡修酺祀六月辛未飛蝗入畿縣三年臨安府蝗七  
年六月浙郡蝗八年四月飛蝗越淮而南江淮郡蝗  
食禾苗山林草木皆盡乙卯飛蝗入畿縣己亥祭酺  
令郡有蝗者如式以祭自夏徂秋諸道捕蝗者以千  
百石計飢民競捕官出粟易之九年五月浙東蝗丁  
巳令郡國酺祭是歲荐饑官以粟易蝗者千百斛十  
年四月楚州蝗紹定三年福建蝗端平元年五月當

塗縣蝗嘉熙四年建康府蝗淳祐二年五月兩淮蝗  
景定三年八月兩浙蝗

紹興十年春有野豕入海州市民刺殺之時州已陷  
夏鎮江軍帥王勝攻取之明年以其郡屬金悉空其  
民乾道六年南雄州民家豕生數豚首各具他獸形  
有類人者慶元初樂平縣民家豕生豚與南雄同而  
更具他獸蹄三年四月餘干縣民家豕生八豚其二  
為鹿古田縣豕食嬰兒淳化三年六月黑風晝晦景  
祐四年七月黑氣長丈餘出畢宿下康定元年黑風  
晝晦元豐末嘗有物大如席夜見寢殿上而神宗崩

元符末又數見而哲宗崩至大觀間漸晝見政和元年以後大作每得人語聲則出先若列屋推倒之聲其形僅丈餘髮鬚如龜金眼行動硜硜有聲黑氣蒙之不大了了氣之所及腥血四灑兵刃皆不能施又或變人形亦或為驢自春歷夏晝夜出無時遇冬則罕見多在掖庭宮人所居之地亦嘗及內殿後習以為常人亦不大怖宣和末寢少而亂遂作政和三年夏至宰臣何執中奉祀北郊有黑氣長數丈出自齋宮行一里許入壇墳繞祭所皆近人穿燈燭而過俄又及於壇禮將畢不見宣和中洛陽府畿間忽有物

如人或蹲踞如犬其色正黑不辨眉目始夜則掠小兒食之後雖白晝入人家為患所至喧然不安謂之黑漢有力者夜執槍棒自衛亦有託以作過者如此二歲乃息已而北征事起卒成金人之禍三年春日有青忽青黑無光其中洶洶而動若鉢金而湧沸狀日旁有黑正如水波周迴旋繞將暮而稍止建炎三年二月甲寅月初出兩黑氣如人形夾日旁至巳時乃散乾道四年春舒州雨黑米堅如鐵破之米心通黑淳熙十一年二月臨安府新城縣深浦天雨黑水終夕十六年六月行都錢塘門啓黑風入揚沙石慶

元元年徽州黃山民家古井風雨夜出黑氣波浪噴湧

咸平元年五月撫州王羲之墨池水色變黑如雲大中祥符元年五月丁丑泰山王母池水變紅紫色四年二月己未河中府寶鼎縣瀵泉有光如燭焰四五炬其聲如雷三年八月解州鹽池紫泉塲也次二年里許不種自生其味特嘉命屯田員外郎何敏中往祭池廟八月東池水自成鹽僅半池潔白成塊晶瑩異常祀汾陰經度制置使陳堯叟繼獻凡四千七百斤分賜近臣及諸列校紹興十四年樂平縣河衝里

田隴數十百頃田中水類為物所吸聚為一直行高  
平地數尺不假隄防而水自行里南程氏家井水溢  
亦高數尺夭矯如長虹聲如雷穿牆毀樓二水閑于  
杉墩且前且郤約十刻乃解各復故

天聖四年十月甲午昏霧四塞靖康元年正月丁未  
霧氣四塞對面不見建炎二年十一月甲子北京大  
霧四塞是夕城陷三年三月車駕發溫州航海乙丑  
次松門海中白霧晝晦六月久陰四年三月乙丑四  
方霧下如塵紹興三年自正月陰晦陽光不舒者四  
十餘日五年正月甲申霧氣昏塞七月劉豫毀明堂

天地晦冥者累日七年氣氣翳日八年三月甲寅晝  
晦日無光陰霧四塞乙卯晝夜雲氣昧濁四月積雨  
方止氣霧四塞晝日無光隆興元年五月丙午朝霧  
四塞二年六月積陰弥月乾道二年十一月久陰五  
年正月甲申晝蒙六年五月連陰六月日青無光淳  
熙六年十一月乙丑晝蒙十三年正月丁亥亦如之  
慶元二年二月己卯晝暝四方昏塞三年二月丁卯  
晝晦昏霧四塞六年十二月辛卯嘉定三年正月丙  
午十年正月乙未十三年三月壬辰皆晝蒙

建炎四年三月辛亥白虹貫日紹興八年三月辛巳

白虹亘天二十七年二月壬寅白虹貫日三十年十

二月辛酉曲虹見日之西乾道三年十月丙申虹見

淳熙元年十月戊寅曲虹見日東二年十月庚辰虹

見五年十月丁巳曲虹見日東慶元元年正月丙辰

白虹貫日嘉泰三年七月壬午亦如之四年十一月

虹見嘉定十一年二月丙辰白虹貫日嘉熙三年十

月乙丑虹見四年二月辛丑白虹貫日淳祐十年十

二月丁巳虹見寶祐五年十月虹見

太祖從周世宗征淮南戰于江亭有龍自水中向太  
祖奮躍乾德五年夏京師雨有黑龍見尾于雲際自

西北趨東南占主大水明年州府二十四水壞田廬  
開寶六年四月單父縣民王羨家龍起井中暴雨飄  
廬舍失族屬及壞舊鎮廨舍三百五十餘區大木皆  
折七年六月棣州有火自空墮于城北門樓有物抱  
東柱龍形金色足三尺許其氣甚腥旦視之壁上有  
煙痕爪跡三十六大中祥符二年八月青蛇出無為  
軍廨長數尺宣和元年夏雨晝夜凡數日及霽開封  
縣前茶肆中有異物如犬大蹲踞卧榻下細視之身  
僅六七尺色蒼黑其首類驢兩頰作魚領而色正綠  
頂有角生極長於其際始分兩歧聲如牛鳴與世所

繪龍無異茶肆近軍器作坊兵卒來觀共殺食之已而京城大水訛言龍復讐云紹興初朱勝非出守江州過梁山龍入其舟纔長數寸赤背綠腹白尾黑爪甲目有光近龍孽也行都柴垛橋旌忠廟三蛇出沒庭廡大者盈尺方鱗金色首脊有金錢遇霽或變化數百于蕉卉間廟徙而蛇孽亦絕十一年四月衡山縣淨居巖有蛇長二丈身圍數尺黑色而方文震死山水大至先是山氣遇夜輒昏昧蛇斃始明二十五年六月湖口縣赤龍橫水中如山寒風怒濤覆舟數十艘士卒溺者數十人三十年春宜黃縣大蛇見于

丞治長二丈捕之縱數里外俄復至者數四乾道五年七月乙亥武寧縣龍闕于復塘村大雷雨二龍奔逃珠墜大如車輪牧童得之自是連歲有水災

太平興國三年靈州獻官馬駒足有二距雍熙二年虔州吏李祚家馬生駒足有距四年鄜州直羅縣民高英家馬生前兩足如牛端拱二年夏州民程真家馬生二駒大中祥符九年十二月大名監馬生駒赤色肉尾無駿宣和五年馬生兩角長三寸四足皆生距時北方正用兵紹興八年廣西海壩有海獸如馬蹄鬚皆丹夜入民舍聚衆殺之明日海溢環村百餘

家皆溺死近馬禍也五年廣西市馬全綱疫死淳熙六年十二月宕昌西馬金州馬皆大疫十二年黎雅州獻馬有角長二寸京房易傳曰臣易上政不順厥妖馬角茲謂賢士不足紹興元年二月丙申右丞相留正乘馬早朝入禁扉馬斃近馬禍也嘉定五年正月史彌遠入賀于東宮馬驚墮地衣幘皆敗其額微損事與上同

建隆元年雄州歸義軍民劉進妻產三男二年孟州民孟福定州民孟公禮等妻各產三男三年齊州晉州大旱民家多生駭龍岡縣民林嗣妻京師龍捷軍

卒宜超妻產三男乾德三年江陵府民劉暉妻產三  
男四年安州驍健軍卒趙遠妻產三男五年光州民  
高與德州民趙嗣乾寧軍卒王進妻產三男開寶元  
年沂州民王政澶州民謝興妻產三男二年閩州民  
孫延廣開州民董遠妻產三男七年青城縣王宥妻  
產三男河南府民劉元妻產三男太平興國二年邢  
州招收軍卒李遇汝州歸化軍卒魚霸常州民謝祚  
妻產三男晉原縣民楊萬妻產三男七年澶州龍衛  
軍卒靳興普州民鄭彥福妻產三男汾州民鄭訓妻  
產三女鴈門縣民劉習妻產四男滑州歸化軍卒安

旺妻產二男一女八年揚州順化軍卒俞劍溫州民  
李遇榮州民李祚妻產三男九年揚子縣民妻生男  
毛被體半寸餘面長頂高烏有眉毛麤密近髮際有  
毛兩道軟長眉紫唇紅耳厚鼻大類西域僧至三歲  
畫圖以獻雍熙二年奉新縣民何靖妻產三男三年  
魯山縣民張羨相州林慮縣民張欽妻產三男四年  
晉原縣民周承暉固始縣民楊昇妻產三男端拱元  
年祁州民馮遇妻產三男二年齊州民徐羨并州民  
侯遠常州卒徐流妻產三男淳化元年正月河陽縣  
民王斌新息縣民李珪妻產三男八月汾州悉達院

僧智嚴頭生角三寸二年晉陵縣民黃釗南充縣民  
彭公霸龍陽縣民周信王屋縣民李清臨清縣民國  
忠鄰水縣吏謝元昇奉化縣卒朱旺妻產三男瀛州  
民胡立邢州民高德妻產三男四年邯鄲縣民鄭安  
河間縣民王希輦安州民宋和妻產三男五年雍丘  
縣營卒盛泰妻產三男至道元年保州敵軍校李深  
宋城縣民王洽臨淮縣民賀用永清縣民董羨鄆城  
縣民馬方妻產三男二年安豐縣民王構伊陽縣民  
張壽成都縣民彭操妻產三男三年汾州民趙演沂  
州民李嗣南劍州民劉相饒安縣民睦鸞衛州官武

軍卒李筠妻產三男咸平元年台州永安縣王旺潭  
州靜戎軍卒鄭穗妻產三男莘縣民懷梁獲嘉縣民  
王貴永康縣民羅彥蹈溫縣民楊榮毗陵縣民魏吉  
妻產三男三年睢縣民朱進鄆州武威軍卒徐逸深  
州民彭遠妻產三男四年望都縣民郭瑩邕州澄海  
軍卒梁濟妻產三男五年夏津縣民趙替妻產三男  
六年石城縣民劉詵堂邑縣民戴興妻產三男平鄉  
縣民郭讓妻產四男景德元年南昌縣民李聰妻產  
三男二年奉新縣民魏勇妻產三男四年八作司匠  
趙榮南頓縣民任登老棗強縣民張緒妻各產三男

大中祥符元年高郵軍民王言妻產四男二年崞縣  
民張留清平軍民楊泉妻產三男三年獲嘉縣民馮  
可妻產三男宋城縣民李悔妻產二男二女四年河  
池縣民馮守欽妻產三男五年大名府宣勇軍卒徐  
璘贊皇縣民李釗妻產三男七年銅鞮縣民李謙宋  
城縣民白德霍丘縣民朱璘平涼縣民焦思順妻產  
三男八年河南府民宋再興真陽縣民周元歷亭縣  
民田用俟言霍丘縣民王忠杜戩濬陽縣民衛志聰  
定州驍武軍卒張吉雍丘縣懷勇軍卒黃進妻產三  
男永嘉縣民張保妻產四男九年曹州雄勇軍卒聶

德瀛州民劉元澧州民張貴廣州民劉吉妻產三男  
天禧元年連江縣民陳霸妻產三男三年錢塘縣民  
謝文信遂安縣民李承遇妻產三男四年孝感縣民  
杜明平恩縣民劉順妻產三男七月耒陽縣民張中  
妻產三男其額有白誌方寸餘上生白髮自天聖迄  
治平婦人生四男者二生三男者四十四生二男一  
女者一熙寧元年距元豐七年郡邑民家生三男者  
八十四而四男者一三男一女者一元豐八年至元  
符二年生三男者十八而四男者二三男一女者一  
元符三年至靖康生三男者十九而四男者一前志

以為人民蕃息之驗。宣和六年都城有賣青果男子  
孕而生子。尋母不能收，易七人始免而逃去。豐樂樓  
酒保朱氏子之妻可四十餘，楚州人。忽生鬚長僅六  
七寸，疏秀而美，宛然一男子。特詔度為女道士。紹興  
三年建康府桐林灣婦產子，肉角有齒，是歲人多產  
鱗毛。二十年八月真符縣民家一產三男。隆興元年  
建康民流寓行都，而婦產子二首，具羽毛之形。乾道  
五年衡湘間人有化為虎者，餘杭縣婦產子青而毛  
二肉角，又有二家婦產子亦如之，皆連體兩面相鄉。  
三家才相距一二里。潮州城西婦孕過期，產子如指。

大五體皆具者百餘蠕蠕能動淳熙十年番易南鄉  
婦產子肘各有二臂及長鬪則六臂並運十三年行  
都有人死十有四日復生十一月辛未鄧家巷婦產  
肉塊三其一直目而橫口十四年六月臨安府浦頭  
婦產子生而能言四日暴長四尺紹熙元年三月癸  
酉行都市人夜以殺相驚奔逃者良久乃定是歲崐  
山縣工采石而山壓三年六月它工采石鄰山聞其  
聲呼相應答如平生其家鑿石出之見其妻喜曰久  
閉乍風肌膚如裂俄頃聲微噤不語化為石人貌如  
生慶元元年樂平縣民婦產子有尾永州民產子首

有角腋有肉翅二年七月進賢縣婦產子亦如之而  
面有三目嘉定四年四月鎮江府後軍妻生子一身  
二首而四臂

淳化五年六月京師疫遣太醫和藥救之至道三年  
江南頗年多疾疫大觀三年江東疫建炎元年三月  
金人圍汴京城中疫死者幾半紹興元年六月浙西  
大疫平江府以北流屍無葬秋冬紹興府連年大疫  
官募人能服粥藥之勞者活及百人者度為僧三年  
二月永州疫六年四川疫十六年夏行都疫二十六  
年夏行都又疫高宗出柴胡製藥活者甚衆隆興二

年冬淮甸流民二三十萬避亂江南結草舍偏山谷  
暴露凍餒疫死者半僅有還者亦死是歲浙之飢民  
疫者尤衆乾道元年行都及紹興府飢民大疫浙東  
西亦如之六年春民以冬燠疫作八年夏行都民疫  
及秋未息江西飢民大疫隆興府民疫遭水患多死  
淳熙四年貞州大疫八年行都大疫禁旅多死寧國  
府民疫死者尤衆十四年春都民禁旅大疫浙西郡  
國亦疫十六年潭州疫紹興二年春涪州疫死數千  
人三年資榮三州大疫慶元元年行都疫二年五月  
行都疫三年三月行都及淮浙郡縣疫嘉泰三年五

月行都疫嘉定元年夏淮甸大疫官募掩骼及二百  
人者度為僧是歲浙民亦疫二年夏都民疫死甚衆  
淮民流江南者飢與暑并多疫死三年四月都民多  
疫死四年三月亦如之十五年贛州疫十六年永道  
二州疫德祐元年六月庚子是日四城遷徙流民患  
疫而死者不可勝計天寧寺死者尤多二年閏三月  
數月間城中疫氣薰蒸人之病死者不可以數計  
熙寧元年七月戊子夜西南雲間有聲鳴如風水相  
激寢周四方主民勞兵革歲動六年七月丙寅夜西  
北雲間有聲如磨物主百姓勞七年七月庚子夜西

北天鳴主驚憂之事紹興二十一年八月乙亥天有聲如雷水響于東南四日乃止開禧元年六月壬寅

天鳴有聲

天禧三年正月晦沈丘縣民駱新田聞震頃之隕石入地七尺許淳熙十六年三月壬寅隕石于楚州寶應縣散如火甚臭腥慶元二年六月辛未黃巖縣大石自隕雷雨甚至山水溟湧

志卷第十五